

Ulloq 10. maj 2000

UPA 2000/12

**Aningaaserivinni ileqqaakkat akileraarutitigut oqilisaaffigineqarnissaat pillugu
Inatsisartut inatsisaata allanngortinneqarneranik Inatsisartut inatsisissaattut
siunnersuut**

pillugu

ISUMALIUTISSIISSUT

Inatsisartut Akileraartarnermut Akitsuusiisarnermullu Ataatsimiititaliaannit

aappassaaneerinissamut saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartuni ilaasortaq Per Berthelsen (S), siulittaasoq
Inatsisartuni ilaasortaq Anders Andreassen (S), Inatsisartuni ilaasortamut Hans
Enoksenimut (S) sinniisussatut peqataasoq
Inatsisartuni ilaasortaq Lars Sørensen (IA)
Inatsisartuni ilaasortaq Daniel Skifte (A)
Inatsisartuni ilaasortaq Mads Peter Grønvald (K)

Inatsisartut Akileraartarnermut Akitsuusiisarnermullu Ataatsimiititaliaata
aningaaserivinni ileqqaakkat akileraarutitigut oqilisaaffigineqarnissaat pillugu
Inatsisartut inatsisaata allanngortinneqarneranik Inatsisartut inatsisissaattut
siunnersuut 2000-imi majip qulingiluaanni ataatsimiinnermini oqaluuseraa.

Inatsisartut Akileraartarnermut Akitsuusiisarnermullu Ataatsimiititaliaata
inuiaqatigiinni ileqqaaruteqartarnerup patajaallisarneqarnissaa pingaartippaa.
Ileqqaaruteqartarnerup patajaallisarneqarnissaanut aqqutissat ilagaat inuiaqatigiit
erniatigut tapiissuteqartarnerisigut immikkoortuni immikkut ittuni
kajumissaasiisarnissaq.

Taamaammatt Ataatsimiititaliap naammagisimaarpaa erniatigut
tapiissuteqarsinnaanermut ukiunik qulinik killiliisimaneq atorunaarsinniarneqarmat,
taamaalillutik akileraarutitigut oqilisaassivigineqarluni aningaaserivinni
ileqqaarnissat sulii pilerinarnerusunngortinneqarsinnaammata.

Akileraartarnermut Akitsuusiisarnermullu Ataatsimiititaliap assut naammagisimaarpaa siunnersuut saqqummiunneqartoq aqputigalugu ilinniagaqarnissaq siunertaralugu ileqqaakkat erniatigut tapiiffigineqartalernissaannut aammaaassisoqarmat, taamaalilluni aamma nunatta inuusuttunik ilinniarluarsimasunik qanoq pisariaqartitsitiginera eqqarsaatigalugu ilinniagarnissaq pilerinarnerusunngortinneqarsinnaammat.

Naggataatigut ataatsimiititaliap naammagisimaarlugu paasivaa siunnersuut aqputigalugu aningaaseriviit nunatsinnut tamakkiisumik ilaannakortumilluunniit akileraartussaataasut tamarmik sullitamik akileraarutitigut oqilisaassivigineqarlutik ileqqaarnissaannik neqeroorfigisinnaanngorlugit ammaanneqartut, taamaalillutik innuttaasut namminneerlutik aalajangersinnaassallugu aningaaserivimmi sorlermi akileraarutitigut oqilisaassivineqartunik ileqqaarusunnerlutik.

Akileraartarnermut Akitsuusiisarnermullu Ataatsimiititaliap isumaqatigiittup matumuuna inassutigaa aningaaserivinni ileqqaakkat akileraarutitigut oqilisaaffigineqarnissaat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut Inatsisartunit akuersissutigineqassasoq.

Per Berthelsen

Anders Andreassen

Lars Sørensen

Daniel Skifte

Mads Peter Grønvold